



REPUBLIKA E SHQIPËRISË  
AVOKATI I POPULLIT  
Seksioni i Veçantë

Adresa: Bulevardi: "Zhan D'Ark" Nr.2  
Tiranë, Shqipëri

Tel/Fax: +355 4 2380 300/315  
E-mail: [ap@avokatipopullit.gov.al](mailto:ap@avokatipopullit.gov.al)  
[www.avokatipopullit.gov.al](http://www.avokatipopullit.gov.al)

Nr. Prot.  
Nr. Dok. 202201460/11

Tiranë \_\_\_/\_\_\_/2023

**Lënda :** *Kërkesë për dërgim dokumentacioni lidhur me shtetasin B.L. dhe fillimin e procedurës disiplinore ndaj drejtorit të Drejtorisë Vendore të Policisë Vlorë.*

**DREJTORISË SË PËRGJITHSHME TË POLICISË SË SHTETIT  
Tiranë**

Me shkresën nr. K2/B12-9 prot., datë 04.04.2023, drejtuar Drejtorisë Vendore të Policisë (DVP) Vlorë, ju kemi vënë në dijeni se me shkresat nr. K2/B12-5 prot., datë 31.01.2023 dhe nr. K2/B12-6 prot., datë 24.02.2023, drejtuar DVP Vlorë, e kemi informuar lidhur me ankesën e bërë në institucionin e Avokatit të Popullit nga shtetasi B.L., lindur më 14.11.1995 dhe banues në fshatin Vllahinë të bashkisë Selenicë. Ankuesi ndërmjet të tjerave shkruan se ka kandiduar për t'u punësuar në Gardën e Republikës dhe pas konkurimit është shpallur fitues. Por, pas shpalljes së rezultateve të konkurimit ai është skualifikuar dhe nuk është pranuar në strukturat e Gardës së Republikës sepse vërtetimi i besueshmërisë së tij i bërë nga Komisariati i Policisë Vlorë dhe konkretisht oficeri i policisë gjyqësore Edvin Habazaj është negativ.

Sipas ankuesit, ai nuk ka asnjë pengesë ligjore dhe morale për t'u punësuar në strukturat e Gardës së Republikës, sepse nuk ka kryer asnjë vepër penale, nuk është i dënuar penalisht, apo që në ngarkim të tij të jetë i hapur ndonjë proces penal në organet e prokurorisë dhe gjykatës. Këtë fakt ai e provon me dokumentacionin e marrë në këto organe të cilin e ka dorëzuar së bashku me kërkesën e aplikimit.

Ankuesi pretendon se nga ana e Komisarariatit të Policisë Vlorë i është bërë një padrejtësi sepse ai i plotëson të gjitha kriteret për të qenë i besueshëm dhe për t'u punësuar në strukturat e Gardës së Republikës.

Për të bërë të mundur shqyrtimin e kësaj ankese, me shkresën nr. K2/B12-2 prot., datë 20.12.2022, drejtuar Komisarariatit të Policisë Vlorë i kërkuam që të na dërgonte një informacion lidhur me pretendimet e ankuesit dhe se cilat janë shkaqet e përpilimit të negativ të vërtetimit të besueshmërisë së tij për t'u punësuar në strukturat e Gardës së Republikës. Gjithashtu i kërkuam që të na informonte se çfarë informacione e materiale ka në ngarkim të shtetasit B.L. nga strukturat e Policisë Kriminale të Policisë së Shtetit që cenojnë besueshmërinë e tij.

Komisariati i Policisë Vlorë me shkresën nr. 7239/1 prot., datë 28.12.2022 ndërmjet të tjerave na informoi se nga Seksioni i Analizës dhe Informacionit Kriminal, në Drejtorinë Vendore të Policisë Vlorë, me shkresën nr. 2221/1, datë 20.10.2022 i është kthyer përgjigje se nga analizimi i të dhënave të grumbulluara, ky shtetas ka pengesa ligjore për të ushtruar veprimtarinë e kërkuar nga ana e Gardës së Republikës, pasi ky shtetas është i evidentuar në Kartotekën e Hetimit të Krimeve në Drejtorinë Vendore të Policisë Vlorë.

Për sa më sipër, bazuar në nenin 63, paragrafi i katërt i Kushtetutës, ku parashikohet se: *“Organet dhe funksionarët publikë janë të detyruar t’i paraqesin Avokatit të Popullit të gjitha dokumentet dhe informacionet e kërkuara prej tij”*, në ligjin nr. 8454, datë 04.02.1999 “Për Avokatin e Popullit”, i ndryshuar, respektivisht në nenin 19, gërma “b” të ku parashikohet se: *“Në rastet kur vendos të kryejë hetime të pavarura, Avokati i Popullit ka të drejtë të kërkojë shpjegime nga çdo organ i administratës qendrore dhe vendore, si dhe të marrë çdo dosje apo material që ka lidhje me hetimin”*, në nenin 20 ku parashikohet se: *“Avokati i Popullit ka të drejtë të kërkojë edhe informacione apo dokumente, që lidhen me çështjen në shqyrtim, të klasifikuara si sekret shtetëror. Në këto raste, ai është i detyruar të respektojë kërkesat për ruajtjen e sekretit shtetëror”*, si dhe në paragrafin e fundit të nenit 19 ku parashikohet se: *“Avokati i Popullit ka të drejtë të caktojë një afat për kryerjen e veprimeve të mësipërme”*, i kërkuam që të na dërgonte brenda 10 ditëve një informacion lidhur me informacionet dhe materialet që administrohen në Kartotekën e Hetimit të Krimeve në Drejtorinë Vendore të Policisë Vlorë apo strukturat e Policisë Kriminale të Policisë së Shtetit në ngarkim të shtetasit B.L. që cenojnë besueshmërinë e tij.

Ndërkohë në këtë shkresë i bëmë me dije se punonjësi i institucionit tonë që trajton këtë ankesë është i pajisur me Certifikatën e Sigurisë të lëshuar nga organi kompetent sipas akteve normative në fuqi.

Ndonëse afati ligjor për kthimin e përgjigjes kaloi, ajo nuk na u kthye. Moskthimi i përgjigjes ka sjellë si pasojë moskorrektesën e institucionit tonë ndaj ankuesit për shqyrtimin e ankesës së tij brenda afatit ligjor. Ndërkohë si rrjedhojë e kësaj është cënuar edhe reputacioni i Avokatit të Popullit në publik.

Nodhur në këto rrethana, për të zgjidhur këtë ngërç, në datën 23.03.2023 punonjësi i institucionit tonë që trajton këtë ankesë shkoi në DVP Vlorë dhe mori takim me

Zv/Drejtorin z. Elton Alushi. Ai e informoi se e kishte deleguar për ndjekje kërkesën tonë, por nga punonjësi i ngarkuar nuk ishte përgatitur përgjigjja e kërkuar.

Ndërsa eksperti i institucionit të Avokatit të Popullit e informoi z. Alushi për të drejtën ligjore që ka institucioni i Avokatit të Popullit dhe punonjësit e tij për t'u njohur e marrë dokumente të klasifikuara dhe ndërkohë i paraqiti atij edhe Certifikatën e Sigurisë të lëshuar nga autoriteti kompetent DSIK-ja. Z. Alushi e vuri në dijeni se do të dërgonte përgjigjen e kërkuar, por insistoi se informacionin e administruar ndaj shtetasit B.L. nuk do ta dërgonte dhe se nuk do të krijonte mundësinë e njohjes së tij punonjësit tonë.

Pas këtij takimi, me shkresën nr. 1262/1 prot., datë 24.03.2023, Drejtoria Vendore e Policisë Vlorë ndërmjet të tjerave na informoi si më poshtë:

*“Policia e Shtetit, për realizimin e veprimtarisë së saj në zbatim të ligjit nr. 108/2014 “Për Policinë e Shtetit”, zbaton edhe “mbledhjen dhe përpunimin e të dhënave personale”, bazuar në nenin 124 të tij, të dhëna të cilat administrohen në dosje dhe në sistemet elektronike të Policisë së Shtetit dhe janë të klasifikuara “Sekret shtetëror”.*

*Dokumentacioni që ju kërkoni, në bazë të Vendimit të Ministrit të Brendshëm nr. 2, datë 08.04.2022, “Lista e informacioneve të klasifikuara “Sekret shtetëror” në Policinë e Shtetit dhe strukturat në varësi të saj” është klasifikuar “Sekret” dhe deri në momentin e deklasifikimit të tyre nuk mund t’ju vihen në dispozicion.*

*Referenca ligjore është ligji nr. 8457, datë 11.02.1999 “Për informacionin e klasifikuar “Sekret shtetëror””, i ndryshuar, neni 21, “E drejta e njohjes së informacionit”.*

Nga përgjigjja e cituar më sipër rezulton se refuzimi i DVP Vlorë për të na vënë në dispozicion dokumentet në ngarkim të shtetasit B.L., të cilat administrohen në Kartotekën e Hetimit të Krimeve në Drejtorinë Vendore të Policisë Vlorë, bazohet në nenin 21 “E drejta e njohjes së informacionit”, të ligjit nr. 8457, datë 11.02.1999 “Për informacionin e klasifikuar “Sekret shtetëror”, i ndryshuar.

Nisur nga kjo përgjigje vlerësuam të nevojshme që të sjellim në vëmendjen e drejtuesit të këtij organi se Avokati i Popullit është një institucion kushtetues i parashikuar në nenet 60 deri 63 të Kushtetutës së Republikës së Shqipërisë. Organizimi dhe funksioni i tij është parashikuar në ligjin organik nr. 8454, datë 04.02.1999 "Për Avokatin e Popullit", i ndryshuar.

Sikurse kemi parashtruar më sipër, e drejta e institucionit të Avokatit të Popullit për të kërkuar informacion nga organet e administratës publike, pjesë e të cilës është edhe Policia e Shtetit, bazohet në nenin 63, pika, të Kushtetutës së Republikës së Shqipërisë, të ndryshuar ku parashikohet se: *“Organet dhe funksionarët publike janë të detyruar t’i paraqesin Avokatit të Popullit të gjitha dokumentet dhe informacionet e kërkuara prej tij”.*

Gjithashtu kjo e drejtë bazohet edhe në ligjin nr. 8454, datë 04.02.1999 "Për Avokatin e Popullit", të ndryshuar dhe konkretisht nenin 19, gërma "b", ku parashikohet se: *"Avokati i Popullit ka të drejtë të kërkojë shpjegime nga çdo organ i administratës qendrore dhe vendore si dhe të marrë çdo dosje apo material që ka lidhje me hetimin"*.

Nga interpretimi i këtyre dispozitave, si asaj kushtetuese neni 63/4 dhe asaj të ligjit organik neni 19/b, kuptohet në mënyrë të qartë se institucioni i Avokatit të Popullit ka të drejtë të kërkojë shpjegime dhe informacione nga çdo organ i administratës qendrore dhe vendore, si dhe të marrë çdo dosje apo material që ka lidhje me hetimin administrativ të ankesave, kërkesave dhe rasteve të filluara me nismën e vet. Ndërkohë organet e administratës publike janë të detyruara t'i japin institucionit të Avokatit të Popullit të gjitha dokumentet dhe informacionet e kërkuara prej tij pa vendosur asnjë lloj kufizimi, kuptohet ato që lidhen me objektin e misionit të vet dhe të kërkesës apo ankesës që trajton, sikurse është edhe rasti në fjalë/shqyrtim i ankesës së shtetasit B.L..

Përfshirja në ligjin organik të Avokatit të Popullit të një dispozite të veçantë, nenit 20, lidhur me informacione apo dokumente të klasifikuara si "Sekret shtetëror" është një veçanti dhe përbën specifikë kushtetuese për informacionet dhe dokumentet e klasifikuara si të tilla.

Sjellim në vëmendje se në nenin 20 të këtij ligji parashikohet se: *"Avokati i Popullit ka të drejtë të kërkojë edhe informacione apo dokumente, që lidhen me çështjen në shqyrtim, të klasifikuara si sekret shtetëror. Në këto raste, ai është i detyruar të respektojë kërkesat për ruajtjen e sekretit shtetëror"*.

Kushtëzimi ligjor i institucionit të Avokatit të Popullit qëndron në fjalinë e dytë të kësaj dispozite e cila parashikon dhe sanksionon se, *në këto raste, ai është i detyruar të respektojë kërkesat për ruajtjen e sekretit shtetëror*. Pra ky kushtëzim detyrues duhet përmbushur me qëllim që institucioni i Avokatit të Popullit (Avokati i Popullit dhe punonjësit e tij) të njihet dhe marrë informacione dhe dokumente të kësaj natyre, të klasifikuara "Sekret shtetëror".

Ndërkohë kjo pjesë përbërëse e kësaj dispozite të referon tek aktet normative në fuqi të cilat kanë si objekt, fushë veprimi dhe qëllim, vendosjen e rregullave të detyrueshme për ruajtjen e sekretit shtetëror.

Akte normative të cilat kanë si objekt të tyre vendosjen dhe zbatimin e detyrueshëm të rregullave në fushën e sekretit shtetëror janë:

**1. Ligji nr. 8457, datë 11.02.1999 "Për informacionin e klasifikuar "Sekret shtetëror"', i ndryshuar.**

Sipas nenit 1 të tij, ky ligj përcakton rregullat për klasifikimin, përdorimin, ruajtjen dhe deklasifikimin e informacionit për sigurinë kombëtare, i cili, me këtë ligj, do të konsiderohet sekret shtetëror. Shteti është zotëruesi i vetëm i sekreteve shtetërore, duke e rregulluar këtë të drejtë me të drejtën e publikut për t'u njohur me veprimtarinë e tij.

Sipas nenit 1/1 të tij, ky ligj zbatohet për të gjitha institucionet shtetërore, qendrore apo të vartësisë, për organet e drejtësisë, prokurorisë dhe/ose personat juridike/fizike, personat me imunitet, ku për ushtrimin e detyrave të tyre, duhet të kenë akses në informacionin e klasifikuar "Sekret shtetëror".

Në nenin 20 të tij parashikohet se:

*"Me ruajtje të informacionit të klasifikuar nënkuptohet tërësia e masave dhe kontrolleve për mbrojtjen e tij.*

*Ruajtja e informacionit të klasifikuar do të bëhet sipas akteve nënligjore të Këshillit të Ministrave."*

Ndërsa, në nenin 21 të tij "E drejta e njohjes së informacionit" parashikohet se:

*"Një person mund të njihet me një informacion të klasifikuar nëse ai siguron një të drejtë njohjeje nga një drejtues institucioni apo personi, të cilit me ligj i është deleguar një e drejtë e tillë, kur:*

*a) personi ka nevojë për njohje informacioni për përmbushjen e interesave dhe qëllimeve të ligjshme;*

*b) personi ka nënshkruar një marrëveshje për mosekspozimin e informacionit;*

*c) personi ka garanci sigurie.*

*ç) personi ka zotësi për të vepruar.*

Më tej, në nenin 25 të tij "Krijimi dhe detyrat e DSIK" parashikohet se:

*"Për të organizuar, drejtuar e kontrolluar masat për ruajtjen, klasifikimin dhe administrimin e informacionit të klasifikuar krijohet Drejtoria e Sigurimit të Informacionit të Klasifikuar (DSIK), si institucion në varësi të Kryeministrit. Drejtori i saj emërohet nga Kryeministri.*

*DSIK-ja ka këto detyra:*

*1. Harton politika, programe e procedura për sigurimin e informacionit të klasifikuar dhe kontrollon zbatimin e tyre prej institucioneve. U rekomandon drejtuesve të institucioneve marrjen e masave të shpejta dhe të përshtatshme për korrigjimin e shkeljeve të vërejtura.*

*2. Mbikëqyr rregullat e sigurimit fizik, ushtarak dhe elektronik të informacionit të klasifikuar, si dhe të anës teknike të marrjes, përpunimit, administrimit dhe arkivimit të tyre.*

*3. Harton procedura për parimet e klasifikimit dhe të shenjëzimit, trajnimit dhe edukimit profesional dhe harton udhëzime për klasifikimin e deklasifikimin. Kryen rishikimin e*

programeve të secilit institucion, kërkon raporte nga këto institucione dhe bashkëpunon për përmbushjen e përgjegjësisë.

4. Bën certifikimin e personelit, i cili do të administrojë informacionin e klasifikuar.

5. Informon të paktën një herë në gjashtë muaj Kryeministrin, për çështjet e mësipërme.

6. I propozon Këshillit të Ministrave akte nënligjore, për çështjet që lidhen me ruajtjen e informacionit të klasifikuar.

7. Shqyrton kërkesa për autoritet klasifikues nga institucione që nuk e kanë atë dhe nëse është e përshtatshme, i'a propozon për miratim Kryeministrin....”

Në nenin 31 të tij parashikohet se:

“Ngarkohet Këshilli i Ministrave të nxjerrë aktet nënligjore në zbatim të këtij ligji për procedurat që do të përdoren në procesin e klasifikimit, deklasifikimit, zhvlerësimit, ruajtjes dhe transferimit të informacionit të klasifikuar”.

2. Në vijim të këtij neni të ligjit të cituar më sipër janë nxjerrë dhe miratuar disa VKM, ndërmjet të cilave po i referohemi:

- **VKM nr. 188, datë 4.03.2015 “Për miratimin e rregullores “Për sigurimin e personelit””**

Sipas nenit 1, objekti i kësaj rregulloreje është:

a) *përcaktimi i rregullave për zhvillimin e procedurave të verifikimit të sigurisë ndaj individëve që do të njohin, do të prodhojnë, do të ruajnë, do të administrojnë, do të transportojnë dhe do të transmetojnë informacion të klasifikuar gjatë ushtrimit të detyrave zyrtare ose në përmbushje të një veprimtarie në kuadrin e respektimit të parimit “nevojë për njohje”;*

b) *përcaktimi i rregullave, mbi bazën e të cilave veprohet për lëshimin, ripajisjen, refuzimin, heqjen dhe pezullimin e “Certifikatës së sigurimit të personelit, për edukimin e sigurisë, inspektimet dhe të drejtën e ankimit të individëve.*

Në nenin 2 të saj “Fusha e veprimit” parashikohet se:

“Rregullat për sigurimin e personelit zbatohen nga të gjitha ministrinë, institucionet shtetërore, si dhe nga operatorët ekonomikë të interesuar për të qenë palë në kontrata të klasifikuara.

Dispozitat e kësaj rregulloreje zbatohen në të njëjtën mënyrë ndaj të gjithë individëve që u nënshtrohen procedurave të verifikimit të sigurisë për t’u pajisur me “Certifikatë të sigurimit të personelit” për njohjen, prodhimin, ruajtjen, administrimin, transportimin dhe transmetimin e informacionit të klasifikuar gjatë ushtrimit të detyrave zyrtare ose në përmbushje të një veprimtarie në kuadrin e respektimit të parimit “nevojë për njohje”.

Në nenin 4 “Kriteret për njohjen e informacionit të klasifikuar” parashikohet se:

Kanë të drejtë të njihen, të ruajnë, të administrojnë e të transferojnë informacion të klasifikuar vetëm individët, që:

a) sigurojnë të drejtën e njohjes nga titullari i ministrisë/institucionit ose Oficeri i Sigurimit Industrial i Kontraktorit për shkak të detyrës që kryejnë;

b) kanë zotësi të plotë për të vepruar;

c) janë të brifuar më parë për njohjen e procedurave të sigurisë së informacionit të klasifikuar dhe të përgjegjësive individuale për shkeljet e sigurisë;

ç) janë të pajisur me CSP, me përjashtim të rasteve për njohjen me informacionin e klasifikuar në nivelin "I kufizuar".

Në nenin 7 "Listat e funksioneve për njohjen e informacionit të klasifikuar" parashikohet:

"Ministrinë dhe institucionet shtetërore të cilat, për shkak të veprimtarisë që kryejnë, prodhojnë informacion të klasifikuar ose gjatë bashkëpunimit me institucione të tjera e përftojnë këtë kategori informacioni, kanë për detyrë të miratojnë dhe të dërgojnë me shkrim në DSIK:

a) listën e funksioneve organike që, për shkak të detyrave zyrtare, mund dhe duhet të njihen me informacionin e klasifikuar të prodhuar nga institucionet shtetërore ose/dhe të përfutur në kuadrin e bashkëpunimit dy-ose shumëpalësh me shtete dhe organizata ndërkombëtare;

- **VKM nr. 312, datë 16.03.2011 "Për miratimin e rregullores "Për punën e informacionit të klasifikuar "Sekret shtetëror""**

Në Kreun e I-rë, parashikohet:

1. Qëllimi i kësaj rregulloreje është disiplinimi i procedurave dhe standardeve që garantojnë sigurimin e informacionit të klasifikuar "Sekret shtetëror", gjatë procesit të krijimit, regjistrimit, qarkullimit, shfrytëzimit, shumëfishimit dhe arkivimit të tij.

Gjithashtu, kjo rregullore krijon një sistem në lidhje me:

a) krijimin, regjistrimin, qarkullimin, shfrytëzimin, shumëfishimin dhe arkivimin e informacionit të klasifikuar "Sekret shtetëror", në institucionet shtetërore;

b) kontrollin e marrjes, dërgimit, regjistrimit dhe shpërndarjes së informacionit të klasifikuar "Sekret shtetëror", ndërmjet institucioneve, në zbatim të ligjit dhe të vendimeve për informacionin e klasifikuar "Sekret shtetëror";

c) evidentimin e shkeljeve që mund të ndodhin gjatë krijimit, regjistrimit, marrjes, dërgimit, shfrytëzimit, shumëfishimit dhe arkivimit të informacionit të klasifikuar "Sekret shtetëror".

2. Pranë çdo ministrie apo institucioni shtetëror, i cili administron informacion të klasifikuar "Sekret shtetëror" funksionon Zyra e Informacionit të Klasifikuar "Sekret shtetëror". Në kuptimin e kësaj rregulloreje, zyra e informacionit të klasifikuar "Sekret shtetëror" në rastet kur nuk funksionon si njësi strukturore e veçantë, përfaqëson personelin e protokoll/arkivit në ministri/institucione shtetërore që, përveç funksioneve

të tyre, janë ngarkuar për punën me informacionin e klasifikuar që kjo ministri/institucion administron.

3. Zyra e informacionit të klasifikuar “Sekret shtetëror” mund të regjistrojë, qarkullojë, administrojë, shumëfishojë, arkivojë edhe informacion të paklasifikuar, por në regjistra të veçantë për informacionin e paklasifikuar.

4. Zyra e informacionit të klasifikuar “Sekret shtetëror”, që ndodhet në ministri ose institucione shtetërore, përfshirë strukturat e tyre përbërëse, ndodhet në varësi të titullarit ose strukturës përkatëse, të cilët janë dhe përgjegjës për funksionimin e saj.

5. Shpërndarja për shfrytëzimin e informacionit të klasifikuar “Sekret shtetëror”, bëhet me miratim të titullarit, vetëm tek ata punonjës, të cilët janë pajisur me “certifikatë sigurie” të përshtatshme dhe në bazë të parimit “nevojë për njohje”.

Në Kreun e III-të ndërmjet të tjerave parashikohet:

1. Zyra e informacionit të klasifikuar “Sekret shtetëror” vendoset në mjedise të përshtatshme, sipas kërkesave për sigurimin fizik të informacionit të klasifikuar “Sekret shtetëror”. Zyra duhet të ketë banakë ndarës ose rrjetë metalike për ndarjen nga mjedisi i brendshëm, dyer të blinduara, kasaforta, dollapë metalikë dhe dritare të sigurt.

2. Në zyrën e informacionit të klasifikuar “Sekret shtetëror” regjistrohet, qarkullon, administrohet, ruhet dhe arkivohet çdo lloj informacioni i klasifikuar “Sekret shtetëror”, pavarësisht nga niveli i klasifikimit të tij.

3. Veprimet e dorëzimit e të marrjes së korrespondencës me informacion të klasifikuar “Sekret shtetëror” bëhen larg dokumenteve, regjistrave e librave, kompjuterit, kasafortës etj.

4. Dokumentet e klasifikuara në zyrën e informacionit të klasifikuar “Sekret shtetëror” mbahen në kasaforta ose dollapë metalikë. Në fund të ditës së punës dokumentet sigurohen në kasaforta a dollapë metalikë në zyrë, të cilat mbrohen me mënyrat më të sigurt që institucioni ka në zotërim....

Pra, referuar akteve normative ligjore e nënligjore të cituara më sipër rezulton se:

Avokati i Popullit është një institucion kushtetues që ka të drejtën ligjore të njohjes së informacionit të klasifikuar. Kjo e drejtë buron dhe sanksionohet në nenin 20 të ligjit nr. 8454, datë 04.02.1999 “Për Avokatin e Popullit” dhe për shkak të nevojës për të përmbushur misionin kushtetues e ligjor në mbrojtje të të drejtave dhe interesave të shtetasve. Punonjësi i institucionit tonë z. Sotiraq Nushi, me detyrë Nd/Komisioner, është i pajisur me Certifikatën e Sigurimit të Personelit nga DSIK-ja, respektivisht me nr. S/091/2003, lëshuar më 23.08.2019 deri më 22.08.2024, kategoria “Tepër sekret”.



Mosdhënia apo mosdërgimi i informacioneve/dokumenteve të klasifikuara “Sekret shtetëror” në ngarkim të shtetasit B.L. të cilat administrohen në Kartotekën e Hetimit të Krimeve në Drejtorinë Vendore të Policisë Vlorë, vjen të kundërshtim të plotë dhe të hapur me aktet normative në fuqi të cituara më sipër, dhe në veçanti me nenin 21 “E drejta e njohjes së informacionit”, të ligjit nr. 8457, datë 11.02.1999 “Për informacionin e klasifikuar “Sekret shtetëror”, i ndryshuar. Ju kujtojmë se ky nen, të cilin në përgjigje DVP Vlorë e referon si bazë ligjore për mos dhënien e mos dërgimin e dokumenteve të kërkuara, bën fjalë për të drejtën e njohjes së informacionit të klasifikuar dhe jo për të drejtën apo detyrimin e institucioneve shtetërore për të mos dhënë këtë lloj informacioni.

Në rastin në shqyrtim, veprimet e institucionit të Avokatit të Popullit dhe të punonjësit të tij që u paraqit në DVP Vlorë në datën 23.03.2023, janë në përputhje të plotë me aktet normative në fuqi të cituara më sipër dhe se nuk ekziston asnjë pengesë ligjore për njohjen me dokumentacionin e klasifikuar si “Sekret shtetëror” që ky organ administron ndaj ankuesit B.L..

Ndërkohë ju sjellim në vëmendje se deri më tani, përveç këtij rasti të veçuar, bashkëpunimi me Drejtorinë e Përgjithshme të Policisë së Shtetit dhe strukturat e saj vendore ka qenë shumë i mirë dhe se nuk na janë krijuar më parë pengesa të tilla për njohjen me informacione të klasifikuara kur ka qenë e nevojshme.

Përveç sa më sipër çmojmë të arsyeshme t’ju bëjmë me dije se nga informacionet e marra gjatë komunikimeve të punonjësve të institucionit tonë me punonjës të strukturave të ndryshme të Policisë së Shtetit lidhur me administrimin e informacionit “Sekret shtetëror” në regjistrat manualë apo dosje si dhe në sistemin elektronik, në jo pak raste ndodh që hidhen informacione “kriminale” në sistem dhe ndonëse pas verifikimeve të bëra më pas ka rezultuar që ato janë pa vlerë, pra nuk janë më të nevojshme për qëllimin për të cilin janë mbledhur, apo ka kaluar periudha kohore e deklasifikimit, nuk reagohej për fshirjen apo bërjen anonime të tyre, sikurse parashikohet në legjislacionin përkatës në fuqi. Ky qëndrim sjell pasoja të ndryshme për shtetasit ndaj të cilëve është regjistruar ky lloj informacioni, si pengesa për të konkuruar për arsimim apo punësim në strukturat e administratës publike për të cilat kërkohet dhënia e vërtetimit të besueshmërisë nga strukturat vendore të Policisë së Shtetit, etj..

Ne vlerësojmë se një fenomen i tillë është jo vetëm me pasoja të rënda në dëm të mbrojtjes dhe respektimit të të drejtave të njeriut, por njëkohësisht është edhe i kundërligjshëm si dhe krijohet mundësia e përdorimit të këtij informacioni nga punonjës policie të caktuar për qëllime jo të ligjshme ndaj shtetasve.

Edhe pas dërgimit të shkresës së fundit, respektivisht me nr. K2/B12-9 prot., datë 04.04.2023, nga DVP Vlorë nuk pati ndonjë reagim pozitiv. Ndonëse tej afatit ligjor, formalisht na u dërgua një përgjigje me të njëjtat justifikime sikurse ishte bërë edhe më parë.

Theksojmë se qëndrimi mosveprues i DVP Vlorë ka penguar institucionin e Avokatit të Popullit për të kryer misionin e tij kushtetues dhe ligjor për të mbrojtur të drejtat dhe interesat e ligjshme të shtetasve dhe konkretisht të shtetasit B.L..

Mosdërgimi nga ky organ i informacionit dhe dokumentacionit të kërkuar, përbën një rast tipik të mosbashkëpunimit të një organi të administratës publike me institucionin kushtetues të Avokatit të Popullit.

Ndodhur në këto rrethana faktike e ligjore, në cilësinë e organit epror të DVP Vlorë, kërkojmë ndërhyrjen tuaj për të bërë të mundur zgjidhjen e këtij ngërçi subjektiv për dërgimin e informacionit dhe dokumentacionit në ngarkim të shtetasit B.L..

Ndërkohë, bazuar në nenin 22/1 “Sanksionet për mosbashkëpunimin me Avokatin e Popullit” të ligjit organik “Për Avokatin e Popullit”, të ndryshuar, ku parashikohet se: *“Refuzimi për të bashkëpunuar me Avokatin e Popullit nga nëpunësi civil, funksionari ose autoriteti publik përbën shkak që Avokati i Popullit të kërkojë nga autoriteti kompetent fillimin e procedurës administrative dhe marrjen e masave disiplinore deri në largimin nga puna ose nga shërbimi civil”*, kërkojmë fillimin e procedurës administrative ndaj drejtorit të DVP Vlorë z. Ermal Muçaj.

*Duke besuar në mirëkuptimin dhe bashkëpunimin tuaj,*

**KOMISIONERI**

**Ermonela Ruspi**

Konceptoi: S. Nushi